

Inatsisartut isummerfigisassaattut siunnersuut, Naalakkersuisut peqquneqassasut naartunermi, erninermi meeravissiarternermilu sulinnigiffeqartarneq pillugu Inatsisartut inatsisaata nr. 5 19. november 2020-imeersut allanngortinneqarnissaanik imaasillugu, angajoqqaatut sulinnigiffeqarneq sapaatit akunnerinit 21-nit sapaatit akunnerinut 37-inut sivitsorneqassasoq aammalu angajoqqaat kiffaanngissuseqarlutik namminneq sulinnigiffeqarnermik aaliangiisinnaassasut.

(Inatsisartunut ilaasortamit Anna Wangenheimit saqqummiunneqartoq)

pillugu

Ilaqutariinnermut Peqqissutsimullu Ataatsimiititaliap

siunnersuutip aappassaaneerreqarnissaanut

ISUMALIUUTISSIISUTAA

Ataatsimiititaliap suliarinninnermini uku ilaasortarai:

Inatsisartunut ilaasortaq Mala Høy Kúko, Siumut, siulittaasoq

Inatsisartunut ilaasortaq Anna Wangenheim, Demokraatit, siulittaasup tullia

Inatsisartunut ilaasortaq Doris J. Jensen, Siumut

Inatsisartunut ilaasortaq Dines Mikaelen, Siumut

Inatsisartunut ilaasortaq Mikivsuk Thomassen, Inuit Ataqtigiit

Inatsisartunut ilaasortaq Edvard Nielsen Aronsen, Inuit Ataqtigiit, sinniisussaq

Inatsisartunut ilaasortaq Mette Arqe-Hammeken, Naleraq

UPA2024-imi 30. april siullermeerinninnerup kingorna siunnersuut ataatsimiititaliap misissorpaa.

Siunnersuutip imarisaa siunertaalu

Aalajangiiffisassatut siunnersuummi saqqummiunneqartumi naartunermi, erninermi meeravissiarternermilu sulinnigiffeqartarneq pillugu Inatsisartut inatsisaata nr. 5, 19. november 2020-imeersoq pillugu Naalakkersuisut allannguutissatut siunnersuusioqqullugit peqquneqassapput, taamaalilluni angajoqqaatut sulinnigiffeqarneq sapaatit akunnerinit 21-iniit sapaatit akunnerinut 37-inut sivitsorneqarluni aammalu angajoqqaat kiffaanngissuseqarlutik namminneq sulinnigiffeqarnermik aalajangiisinnaaqullugit. Siunnersuummi tunngavilersuutigineqartuni allassimavoq pitsaassusaanut aammalu ulluunnerani paaqqinnittarfinnut atuarfinnullu naatsorsuutigineqartunut tunngatillugu

unamillernartoqangaatsiartoq. Siunnersuuteqartoq isumaqarpoq siunnersuut ilaqutariinnermut politikkimut ilanngullugu aammalu ilaqutartaarnissamut annertunerusumik kaammattuutitut isigineqassasoq.

Siunnersuutip Inatsisartunit siullermeerneqarnera

Siunnersuut tigulluarneqarlunilu tapersorneqarpoq, ulluunerani paaqqinnittarfinni maannakkut unamillernartorpassuarnut tunngasut aammalu ilaqutariit ulluinnarni pitsaanerusumik atugaqarnissaasa qulakkeerneqarnissaa oqallinnermi sammineqarput. Tamatuma saniatigut oqallinnermi ataataasut erninnermut atatillugu sulinngiffeqartarnissaat sammineqarpoq, Naalakkersuisullu oqaatigaat arnat agguaqatigiissillugu meerartaarnerit tamaasa inuunermi isertitassamik 10 %-ii annaasaraat, akerlinganik aapparisaq isertitai ataatsimut isigalugu sunnerneqarnej ajortut. Aammattaaq namminersortutut inuuniutillit atugaat sammineqarput, ingammik nujalerisut atugaat. Tamatuma saniatigut aalisartut piniartullu ilaqutaannut immikkut unamillernartut eqqaaneqarput.

Tamanna tunngavigalugu immikkoortoq ataatsimiititaliamit suliarineqartussanngorlugu innersuuneqarpoq.

Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinneqarnissaanut aningaasaqarnikkut allaffissornikkullu kingunerisassat siunnersuummi tunngavilersuutitut allaaserineqassasut.

Taamaalilluni siunnersuutip piviusunngortinnissaani aningaasatigut kingunerisassai siunnersuummut naapertuuttut ataatsimiititaliap maluginiarpaa, taamaalillunilu angajoqqaat sulinngiffeqartarnerisa sivitsorneqarnissaanut katillutik 11,9 million kr.-inik aningaasartuuteqarnissaq naatsorsuutigineqartoq. Tamatuma saniatigut inatsit akuerineqassappat namminersortutut inuuniutillit erninnermut atatillugu sulinngiffeqarnissami paarlaseqartussaaneq pillugu piffissami sivitsorneqarsimasumi aningaasartuuteqarnerulissasut siunnersuuteqartup oqaatigaa. Angajoqqaat sapaatip akunnerini 16-ini angajoqqaatut sulinngiffeqarnissap sivitsornissaanut pisussaaffeqanngillat pisinnaatinneqassallutilli.

Tassunga atatillugu sivitsukkamik angajoqqaatut sulinngiffeqarsinnaatitaanermut periarfissap qanoq amerlatigisunit atorumaneqarnissaata nalorninartoqarnera ataatsimiititaliap oqaatigaa.

Ulloq 6. maj Naalakkersuisut ilisimatitsiviusumik ataatsimeeqatigineqarnerat

Malittarisassat maannakkut atuuttut misissornissaat pillugu Isumaginninnermut, Suliffeqarnermut Nunamullu Namminermut Naalakkersuisup ataatsimiititaliaq aggersarpaa, pissutsillu siunnersuutip matuma piviusunngortinnissaanut pingaaruteqarsinnaasut ilisimatitsissutigalugit. Ataatsimiinnermi saqqummiunneqartut isumaliuutissiisummi

matumani ilanngussaq 1-itut ilanngunneqarput.

Sassartitsinerit

Ulloq 14. maj KNAPK ataatsimiititaliamut sassartinneqarpoq, siunnersuullu pillugu isiginnittaatsitik eqqarsaatersuutitillu eqqartorlugit.

Ataatsimiititaliap siunnersuummik suliarinninnera

Angajoqqaat sulinnigiffeqartarnerisa sivitsorneqarnissaa pillugu ilisimatitsiviusumik Naalakkersuisut ataatsimeeqatiginerini iluaqutissartai pillugit atortussat paasissutissallu annertuut ataatsimiititaliap pissarsiarai. Tamatuma saniatigut siunnersuutip piviusunngortinnissaanut tunngatillugu ataatsimiititaliaq paasissutissanik pissarsiaqarpoq. Erninermut atatillugu sulinnigiffeqarnerup sivitsorneqarneratigut meeqqamut sunniutit pitsaasut, takuneqarsinnaammat angajoqqaat sivisunerusumik sulinnigiffeqarsimasut meeraat 7. klassimi aamma 8. klassimi ingerlalluarnerusarnerat, ataatsimiititaliap pingaartumik erseqqissaatigaa. Aammattaaq meeraq inooqataanikkut misigissutsikkullu aalaakkaassuseqarneranut nukittorsaataavoq, aamma meeqqat inuuniarnikkut atugarliortut sulinnigiffeqarnerup sivitsorneqarnera annerpaamik iluaqutigissavaat, takuneqarsinnaammat meeqqat 9. klassimi atuanngitsoortarnerat annikinnerusartoq angusaallu qaffasinnerusarlutik. Siunnersuutip suliarineqarnerani sunniutit taakkartorneqartut assut pingaaruteqartutut ataatsimiititaliamit isigineqarput.

Tamatuma saniatigut sulinnigiffeqarnissamut aalajangersimasumik atugassanik aningaasanik immikkoortitsineq ataataasut sulinnigiffeqarnerunissaannut sakkussatut sunniuteqarnerpaajunera Nunani Avannarlerni misilittagaqarfigineqartoq ataatsimiititaliamit maluginiarneqarpoq. Tassunga atatillugu sulinnigiffeqarnerup sivitsorneqarnissaa pillugu angajoqqaat namminneq qanoq aaqqissuutissanerlugu aalajangissagaat siunnersuummi siunertarineqartoq ataatsimiititaliap maluginiarpa.

Naggataatigullu Naalakkersuisut namminersortunut pitsanngorsaatisanik arlalinnik siunnersuuteqartut ataatsimiititaliap maluginiarpa, aammalu qupperneq 18-imi ilanngussaq 1 innersuussutigalugu. Taamaalilluni siunnersuutip piviusunngortinnerani namminersortunut pitsanngorsaatisat pillugit eqqarsaatersuuteqarnissaq pingaaruteqarpoq, matumani ilanngullugit aalisartut piniartullu.

Ataatsimiititaliap inassuteqaatai

- Ataatsimiititaliap isumaqatigiittup siunnersuutip akuerineqarnissaa inassutigaa

Ataatsimiititaliap isumaqatigiittup suliap ingerlanneranni KNAPK peqataatissagaa kaammattuutigaa. Taamatuttaaq qaqugu inatsisissap atuutilernissaanut inuuttaasunut malinnaatitsinissaq kaammattuutigineqarluni.

Naleqqap ikinnerussuteqarluni oqaaseqaat imaattoq saqqummiuppaa:

Imm 98 UPA 2024 - ikinnerussuteqarluni oqaaseqaat

Naartunermi, erninermi meeravissiartaarnermilu sulinngiffeqartarnermi sapaatit akunnerini qaffaaniarnermi piniartut aalisartullu namminersortut aaqqiiffigineqarnissaat Naleqqamit kissaatigaarput, takusinnaagatsigu assigiinngitsumik pineqartuartartut, taamaattussaannartullu isigineqarnerat pineqartarnerallu akueriuminaatsikkatsigu Naleqqamiit oqaatigissuarput.

Maluginiakkatta ilagisimavaat qaammatit kingulliit pingasut isertitat qiviarneqassasut taakkualu eqqortumik takutitsinngippata ukiumut isertitat atorneqarsinnaasut, ila taamatut ingerlanaq assigiinngisitsinermik iliorniisoq Naleqqamiit nalilerparput. Tassami aappaasoq inooqataasoq ukioq kaajallallugu aamma uatsitulli suliffini suliffigivaa inooqatimi aappaami tikiussugai suliaralugit.

KNAPK oqarnera malillugu pineqartut politikkikkut qarsupinneqangaatsiarneqarsimasut massakkullu taamatut pineqartarnertik pillugu nilliasalernikuusimasut, tamanna Naleqqamiit paasilluarsinnavarput aamma taamatut saqqummertalernerat pissusissamisoortutut isigaarput, tassami assigiimmik nunami maani inuiaat qulequttamut tunngatillugu assigiimmik tamarmik pineqartariaqalerput, meeraq meeraavoq nunatsinni meeqqat assigiimmik tamarmik pineqartariaqalerput.

Eqqarsaatersuuteqaannarnissaq Naleqqamiit akuersaannngilarput iliuuseqartoqarnissaajuna pingaartikkatigut tamaatut Naleqqamiit ikinnerussuseqarluta oqaaseqartugut.

Naleqqamiit piniartut aalisartullu aapparisaat naligiimmi pineqarnissaat pingaartipparput, naleqqamiit oqaatigissuarput piniartut aalisartullu aapparisaa suliuartuummata timelersunnngikkaluarlugu uppernarsaatissaqareerpoq, tassami ullaamiit unnummut sulisarpoq piniakkat tikiussorneqartut suliaralugit suliffigigamikku.

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.

Mala Høy Kúko
Siulittaasoq

Anna Wangenheim
Siulittaasup tullia

Doris J. Jensen

Dines Mikaelen

Mikivsuk Thomassen

Edvard Nielsen Aronsen

Mette Arge-Hammeken